



REPUBLIKA E SHQIPËRISË  
KOMISIONERI PËR TË DREJTËN E INFORMIMIT DHE MBROJTJEN  
E TË DHËNAVE PERSONALE

Nr. 350/3 Prot

Tiranë, më 5.4 2017

VENDIM

Nr. 57, datë 5.4.2017

Në mbështetje të neneve 29, 30, 31 a/1, 32 dhe 39 të Ligjit Nr. 9887, datë 10.03.2008, "*Për Mbrojtjen e të Dhënave Personale*" i ndryshuar, neneve 77-112 të Ligjit Nr.44/2015, datë 30.04.2015, "*Kodi i Procedurave Administrative të Republikës së Shqipërisë*", si dhe provave të administruara në ngarkim të kontrolluesit, "*Universiteti Europian i Tiranës*". Komisioneri për të Drejtën e Informimit dhe Mbrojtjen e të Dhënave Personale,

VËREN:

Në zbatim të Urdhrit Nr.56 datë 17.02.2017, të Komisionerit për të Drejtën e Informimit dhe Mbrojtjen e të Dhënave Personale (në vijim quajtur "Komisioneri"), Drejtoria e Hetimit Administrativ kreu hetim administrativ pranë kontrolluesit, "*Universiteti Europian i Tiranës*", me objekt kontrolli:

- Zbatimi i Ligjit Nr. 9887 datë 10.03.2008 "*Për mbrojtjen e të dhënave personale*" i ndryshuar (në vijim quajtur "Ligji për Mbrojtjen e të Dhënave Personale") dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit "*Universiteti Europian i Tiranës*".

Grupi i kontrollit, gjatë kryerjes së veprimeve procedurale u asistua nga përfaqësuesit e kontrolluesit, të cilët ishin njohur me Urdhrin Nr.56, datë 17.02.2017 të Komisionerit.

Kontrolluesi "*Universiteti Europian i Tiranës*", është një institucion privat i arsimit të lartë dhe ushtron aktivitetet nëpërmjet Fakultetit Juridik, Fakulteti Ekonomik dhe i Teknologjisë së Informacionit dhe Fakulteti i Shkencave Sociale dhe Edukimit.

Kontrolluesi përpunon të dhëna personale kryesisht për subjektet e të dhënave "punëmarrës", "*studentë*" dhe "*vizitorë*" përpunimi i të cilave kryhet në mënyrë manuale (nëpërmjet dokumentacionit në formatin letër) si dhe në mënyrë elektronike nëpërmjet sistemeve të teknologjisë së informacionit të tilla si sistemi i video-vëzhgimit (CCTV), portali zyrtar i institucionit, portali i studentit, pajisje kompjuterike etj.

Nga hetimi administrativ i kryer pranë këtij kontrolluesi u konstatua:

1. Kontrolluesi mbikëqyr ambientet e brendshme dhe të jashtme nëpërmjet sistemit të video-vëzhgimit (CCTV). Kontrolluesi ka vendosur tabela informuese mbi prezencën e sistemit të video-vëzhgimit (CCTV) vetëm në ambientet e brendshme dhe ato nuk janë as lehtësisht të dallueshme dhe as në përputhje me modelin standard të miratuar me Udhëzimin Nr.3 datë 05.03.2010 të Komisionerit "*Mbi përpunimin e të dhënave personale me sistemin e video survejimit në ndërtesa dhe mjedise të tjera*".

2. Kontrolluesi nuk ka publikuar "Politikat e Privatësisë" në portalin zyrtar <http://www.uet.edu.al>.
3. Kontrolluesi nuk ka nënshkruar "Deklaratë Konfidencialiteti" me punëmarrësit në lidhje me përpunimin e të dhënave personale, tek të cilat kanë akses për shkak të detyrës.

Në përfundim të kontrollit administrativ, referuar provave dhe konstatimeve në vend, grupi i kontrollit hartoi procesverbalin dhe e lexoi në prani të përfaqësuesve të kontrolluesit, të cilët u shprehën se: "Pretendimet do t'i paraqesim me shkrim brenda një afati 5 ditor".

Kontrolluesi "Universiteti Europian i Tiranës" nuk paraqiti asnjë pretendim sipas deklarimit në momentin e nënshkrimit të procesverbalit.

Në zbatim të neneve 87 - 89 të Ligjit Nr.44/2015 "Kodi i Procedurave Administrative të Republikës së Shqipërisë", me qëllim ushtrimin e së drejtës për t'u dëgjuar nga Zyra e Komisionerit përpara marrjes së vendimit përfundimtar, kontrolluesi "Universiteti Europian i Tiranës" është njoftuar zyrtarisht për pjesëmarrje në seancën dëgjimore që do zhvillohej në datë 16.03.2017.

Përfaqësuesit e kontrolluesit, në këtë seancë dëgjimore, u shprehën se po vijohet me korrigjimin e gjetjeve të konstatuara, por nuk u paraqit asnjë provë që të vërtetonte procesin e hartimit dhe nënshkrimit të "Deklaratës së Konfidencialitetit" me pjesëtarët e stafit akademik dhe administrativ si dhe lidhur me vendosjen e tabelave lehtësisht të dallueshme dhe në përputhje me modelin standard të miratuar me Udhëzimin Nr.3 datë 05.03.2010 të Komisionerit "Mbi përpunimin e të dhënave personale me sistemin e video survejimit në ndërtesa dhe mjedise të tjera" në ambjentet e brendshme dhe të jashtme të godinave.

Sa i përket "Deklaratës së Konfidencialitetit", Zyra e Komisionerit sqaron se, detyrimi i përcaktuar në nenin 30 të Rregullores "Për mbrojtjen e të dhënave personale" të kontrolluesit "Universiteti Europian i Tiranës" lidhur me ruajtjen e konfidencialitetit, për çdo të dhënë të përpunuar për shkak të detyrës, nuk e përmbush qëllimin sipas Vendimit Nr.6 datë 05.08.2013 "Për përcaktimin e rregullave të hollësishme për sigurimin e të dhënave personale".

Nënshkrimi i "Deklaratës së Konfidencialitetit", është një mekanizëm i cili vë përpara përgjegjësisë për ruajtjen e konfidencialitetit, çdo punëmarrës që përpunon të dhëna personale gjatë dhe për shkak të detyrës. Në zbatim të nenit 28 të Ligjit për Mbrojtjen e të Dhënave Personale sipas të cilit - "Kontrolluesit, përpunuesit dhe personat, që vihen në dijeni me të dhënat e përpunuara, gjatë ushtrimit të funksioneve të tyre, detyrohen të ruajnë konfidencialitetin dhe besueshmërinë edhe pas përfundimit të funksionit. Këto të dhëna nuk përhapen, përveç rasteve të parashikuara me ligj", Komisioneri ka nxjerrë Vendimin nr. 6 të datës 05/08/2013 për "Përcaktimin e rregullave të hollësishme për sigurimin e të dhënave personale", si një mjet për të garantuar zbatimin e ligjit.

Mospërmbushja e detyrimit për të nënshkruar "Deklaratë Konfidencialiteti" përbën shkelje të nenit 28 të Ligjit të sipërcituar dhe Vendimit nr. 6 të Komisionerit datë 05/08/2013 për "Përcaktimin e rregullave të hollësishme për sigurimin e të dhënave personale".

Kjo shkelje, në kuptim të nenit 39/1 shkronja "dh" të Ligjit Për Mbrojtjen e të Dhënave Personale, përbën kundërvajtje administrative dhe sanksionohet me gjobë:

"dh) - kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10 000 deri në 150 000 lekë."

Në caktimin e masës së gjobës, mbahet parasysh fakti se kontrolluesi "Universiteti Europian i Tiranës" ka qenë subjekt kontrolli në vitin 2011, kontrolli i cili përfundoi me akt Rekomandimi Nr.29/1, datë 06.07.2011 të Komisionerit, por dhe pas aktit rekomandues detyrues, kontrolluesi ka neglizhuar detyrimet që burojnë nga Ligji Nr.9887, datë 10.03.2008 "Për mbrojtjen e të dhënave personale" i ndryshuar, dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, për kategoritë e subjekteve "student" dhe "punëmarrës".

Kontrolluesi *Universiteti Europian i Tiranës*, në formën ligjore të aktivitetit të tij është person juridik dhe sipas nenit 39/2 për kundërvajtjet e mësipërme, dënohet me dyfishin e gjobës së përcaktuar në pikën 1 të këtij neni.

Në lidhje me konstatimet e pikave 1 dhe 2 më sipër, të cilat kanë të bëjnë me informimin e individëve lidhur me sistemin e video vëzhgimit *CCTV* dhe formatin e tabelave informuese lidhur me këto të fundit si dhe *Politikat e Privatësisë*, Zyra e Komisionerit, në bazë të nenit 31 a/1 të Ligjit për Mbrojtjen e të Dhënave Personale, do të dalë me rekomandime lidhur me zbatimin e detyrimeve të përcaktuara sipas Ligjit për Mbrojtjen e të Dhënave Personale.

### PËR KËTO ARSYE:

Në zbatim të neneve 28, 29, 30/2 dhe 31/1, gërma a/1, 32, 39 pika 1, gërma "dh", nenit 39, pika 2 e Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, si dhe akteve të Komisionerit,

### VENDOSA:

1. Dënimin e kontrolluesit "Universiteti Europian i Tiranës", me gjobë në vlerën **50.000 (pesëdhjetë mijë) lekë** për shkelje të detyrimeve të përcaktuara në nenin 28 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, si dhe Vendimit Nr.6 datë 05.08.2013, "Për përcaktimin e rregullave të hollësishme për sigurimin e të dhënave personale".
2. Kontrolluesi "Universiteti Europian i Tiranës", në zbatim të nenit 28 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, të hartojë Deklaratat e Konfidencialitetit për çdo punëmarrës që akseson të dhëna personale.
3. Kontrolluesi "Universiteti Europian i Tiranës", në zbatim të nenit 18 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, të marrë masat për të përfshirë në faqen e tij zyrtare të internetit rubrikën "Politikat e Privatësisë".
4. Kontrolluesi "Universiteti Europian e Tiranës", në zbatim të nenit 18 të Ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar, të marrë masat për informimin e subjekteve të të dhënave mbi prezencën e sistemit të video-surveimit (CCTV), në përputhje me Udhëzimin nr. 3 datë 05.03.2010 "Mbi përpunimin e të dhënave personale me sistemin e video surveimit në ndërtesa dhe mjedise të tjera";
5. Në zbatim të nenit 32/1 të Ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar, të kryhen plotësimet e detyrimeve të parashikuara në pikat 2, 3, dhe 4 të këtij Vendimi, brenda një afati 10 ditor nga momenti i marrjes dijeni.

6. Në rast mos përmbushje të këtyre detyrimeve, Komisioneri vepron sipas nenit 30, pika 2 të Ligjit Nr.9887, datë 10.03.2008 "Për Mbrojtjen e të Dhënave Personale", i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht, në rastet e përsëritura të moszbatimit të rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.
7. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përbarimit.
8. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij vendimi.

Ky vendim u shpall sot më datë, 5 . 4 .2017.

